

Ils 24 da november: Sogn Crisogon e sontga Anastasia, marters



Crisogon, naschius el tierz tschentaner, ei staus in niebel cavalier roman e muort sia sontga veta e gronda sabientscha fuva el fetg stimaus dils cristians. Per defender la cardientscha catolica e gidar il proxim spargnava el negina fadigia. Las notgs vegliava el en oraziun els oratoris ni loghens sutterrans. Dil di caminava el tier las grottas e casas dils fideivels, visitava ils perschuniers, deva ad els curascha d'endarar per amur da Diu e gudignava aschia biaras olmas tier Cristus. Muort las biaras ovras da carezia fuva Crisogon vegnius tgisaus e mess a ferm en perschun. Dus onns eis el staus leu e vegnius mantenius da Anastasia che purtava ad el las caussas pli necessarias per levgiar empau las miserias dalla perschunia.

Era Anastasia fuva in dunna romana, nobla, reha e da buns talents. Il bab Prestetatus era in pagaun e la mumma Fausta zuppadamein ina cristiana. Per vuler da ses parents ha Anastasia stuiu semaridar cul grond signur Publius dalla cuort digl imperatur Dioclezian che fuva in sgarscheivel inimitg dils cristians. Quel, observond che sia dunna mondi savens a visitar perschuns e principalmein quella da sogn Crisogon, ha el suspectau che sia dunna savessi esser ina cristiana. Lura ha el spiunau ora ella entochen ch'el ha giu fermes mussaments e staus avunda informaus. Da quei tut ravgiaus ha Publius schau serrar sia virtuosa dunna en ina combra dalla cuort e mess ina rigurusa guardia avon esch, per ch'ella sappi buca pli ir a gidar ils cartents en las perschuns e stoppi murir plaun a plaun dalla fom. Cura che Anastasia vegneva aschi malamein tractada da siu mariu, plirava ella perquei ch'ella saveva buca pli spender almosnas als cristians perschuniers. Mo inaga ha ella survegniu ina caschun da scriver suandonta brev a sogn Crisogon:

Al sogn confrar da Jesus Cristus Crisogon Anastasia

Vus saveis che miu bab fuva in pagaun e mia mumma ina cristiana, ina dunna castissima che temeva Diu ed ha mei da pign ensi educau ed instruui en la cardientscha da Jesus Cristus. Suenter sia mort sun jeu vegnida dada per dunna ad in fetg crudeivel um. Tras la misericordia divina vai jeu cun diversas stgisas e pretexts pudiu sedeliberar dalla cumpignia e dil letg. Di e notg rugavel jeu Cristus per la grazia che jeu possi suandar sias sontgas vertids. Quei criu um ei vegnius sisu che jeu sun cristiana ed el consumescha mia rihezia cun schliata glieud e pagauna. El tegn mei serrada en in liug plein miserias per schar murir mei, sco sche jeu fuss ina sclava e stria. Aschi bein che dar la veta per amur da Jesus Cristus fuss a mi ina caussa zun plascheivla, displai ei a mi grondamein che mia rauba che vevel unfriu si a Diu, vegn duvrada per far turpegius sacrificis als fauls dieus. Perquei roghel jeu tei, grond survient da Diu da rugar il Segner ch'el detti a miu um ina liunga veta, sch'el vess inaga da seconverter; mo sch'el vess da restar stinaus en sia superstiziun ch'el prenda el naven dil mund. Pertgei igl ei meglier ch'el mieri che da snegar il Fegl da Diu e perseguitar ils suandoners da Cristus. Jeu empermettel al Diu tutpussent, sche jeu pos cheu vegnir libra, da spender tuts dis da mia veta per assister ils confessurs dil sogn evangeli, sco quei che vevel

pli baul per moda da far per lur basegns. Diu seigi cun tei, o um tut da Diu e veies memoria da mei en tias oraziuns.

Questa brev ha sogn Crisogon retschert e legiu en preschientscha dils auters perschuniers. Tuts han urau ensemen per sontga Anastasia e sogn Crisogon ha lu dau questa risposta:

*Crisogonus, perschunier da Jesu Cristo
salid all'Anastasia.*

Enten las tempiastas da quest mund che crodan tier, tegn per segir o signura che Diu vegni a ti en agid e scatschi a bass il demuni che turmenta tei. Hagies pazienza enten las travaglias e patratga che ti seigies sin miez la mar, sbattida d'enqual furiosa malaura e sefida che Cristus ha da vegnir sin quella furiosa aua per liberar tei e quietar las undas. Cloma cul profet che di: Pertgei eis ti olma mia tresta e pertgei seperturbeschas? Hagies speranza en Diu e spetga tgeuamein siu agid. Patratga o signura che Diu vul dar a ti il bien dil parvis tras quei ch'el pren naven il bien dalla tiara. Sch'ei para a ti ch'el s'entardi da vegnir, sappies ch'el fetschi quei, sinaquei che ses duns vegnien pli fetg stimai. Buca veglies secontristar u lamentar che ti per viver bein, seigies messa en tontas travaglias. Diu emprova zuar, mo engona buca. Il carstgaun ei in enganader e quel che sefida dalla glieud e metta sia speranza sin la glieud, quel ei smaledius. Encuntercomi ei benedius quel che metta sia speranza en Diu. Fui cun tutta premura tuts puccaus, tegn exactamein ils condaments e lai a Diu il quita co spindrar tei. Cura che ti meins patratgas, vegn el a consolar tei. Suentar la notg arriva il di, suenter gl'unviern la primavera e suenter la tempiasta la bial'aura, sinaquei che ti possies far dil bien a quels che vegnan persequitai per amur da Cristus e possies cun tias almosnas contonscher da Diu la pagaglia perpetna. Diu seigi cun tei e roga per mei!

Tala brev ei stada da gronda consolaziun per Anastasia ch'ella suffreva cun marvegliusa pazienza sias travaglias. Encuntercomi daventava siu mariu adina pli crius ch'ella veva mintgadi da magliar nuot auter ch'in pign toc paun. Da quei, cartend ch'ella stuessi gleiti murir, ha scret in'otra brev cun quests plaids:

*Al beau marter e confessur da Cristo, Crisogono.
Anastasia.*

La fin da mes dis ruchegian neutier. Roga Diu ch'el retscheivi mi'olma, cura ch'ella sparta dil tgierp; pertgei per amur sia piteschel jeu ils turments, ils quals quella dunna vegn a plidar che presenta a ti questa brev.

Il sogn ha lu puspei rispundiu:
Crisogonus all'Anastasia.

Las stgiradetgnas van adina avon alla glisch, suenter la malsogna tuorna la sanadad e suenter la mort ei la veta empermissa. Tuttas adversitads e ventiras da questa veta peglian ina fin, sinaquei ch'ils travigliai sedesparien buca ed ils cuntentai daventien buca loschs e garmadis. Nus tuts navighein sin la medema mar; nos corps ein sco tontas navs. Ina parts ein schi fermas ch'ellas pon rumper las undas e passar senza pitir donn; autras denton ein schi fleivlas ch'ellas cun mintga pass cuoran el prighel. Seconsolescha ti survienta da Jesus Cristus, pertgei tia navigaziun vegn a prender ina ventireivla fin, tier tut l'aura stemprada.

Porta denton generusamein la greva crusch da Jesus Cristus e seregorda ch'era Cristus porta quella cun tei. Seigi tiu cor disponius d'embratschar aunc pli grondas travaglias e peinas. Dubeta buca, ti vegns ad arrivar tier la desiderada riva e cun tia gronda gloria ad esser encoronada cun la palma dil marteri.

Sco sogn Crisogon ha detg eis ei era d'aventau. Il crudeivel mariu Publius ch'era sco ambassadur digl imperatur Dioclezian sin via tiel retg dalla Persia, ei sin quei viadi morts miserablamein. Tras quella mort ei Anastasia stada liberada dalla perschunia e puspei d'aventada patruna da siu fatg. Danovamein ei la sontga semessa el survetsch a Diu e partgiu ora da sia rauba per mantener ils paupers, cunzun ils sogns confessurs e marters da Cristus. Pertgei da quei temps fuvan las perschuns pleinas da sogns marters. Quels visitava sontga Anastasia ussa, consolava e deva uorden a mintgin tenor lur basegns.

Muort ton engaschi eis ella d'aventada meriteivla dalla cruna dil marteri. Ella vegn messa a ferm en ina stermentusa perschun. Duront dus meins eis ella vegnida visitada dil sogn marter Teodorus che purtava la spisa dil tschiel. Lu vegn Anastasia menada en ina nav cun aunc 200 umens e 70 dunnas, tuts cristians ora sin la mar per surdar l'entira cumpignia allas undas, senza providiment ed uorden da navigar. Mo tras la divina providientscha ei quella buca ida sutsu e vegnida a riva sin l'insla Palmaria. Leu ei la sontga vegnida ligiada dils pagauns vid in lenn alzada ord la tiara e barschada viva ils 25 da november entuorn igl onn 303. Ed ussa pertuccont sogn Crisogon.

El ei suenter dus onns perschunia vegnius menaus ad Aquileia avon igl imperatur Dioclezian. Quel offereva al sogn da tuttas rihezias, grazias ed uffecis, per ch'el aduri ils dieus da siu reginavel. Mo sogn Crisogon ha confessau statteivlamein Jesus Cristus per ver Diu e lu smalediu e teniu ils fauls dieus per negin auter che per demunis. Dioclezian dat als hentgers il camond da tagliar giu il tgau al sogn e fierer il tgierp en la mar. Suenter dus dis ha il sogn spiritual Zoilus anflau il tgierp ed era il tgau e lu satrau las restonzas tgeuamein en sia casa. Trenta dis pli tard ei sogn Crisogon cumparius al spiritual, engraziau per quella carezia viers siu tgierp e segirau ch'el vegni prest ad esser en sia cumpignia ella gloria perpetna dil parvis, sco igl ei lu era d'aventau. Il marteri da sogn Crisogon ei carteivlamein staus ils 24 da november digl onn 303.

Reflexiun

Rars ein ils carstgauns che han buca cruschs. Aschia san tut quels seconfortar cun leger las brevs che sogn Crisogon ha scret a sontga Anastasia. Vileg. Ribad.